

# ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՍԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

**ՆՈՐ ՇՐՋԱՆ, Ը. Տարի, Թիւ 335, Ուրբաթ, 27 ՄԱՅԻՍ, 2016**

## ՀԱՄԱՅՆՔԱՅԻՆ

## Հ.Մ.Ը.Մ.Ի ԿԵԴՐՈՆԱԿԱՆ ՎԱՐՉՈՒԹԵԱՆ ԱՏԵՆԱՊԵՏԸ ԱՅՑԵԼԵՑ ԱԶԳԱՅԻՆ ԱՌԱՋՆՈՐԴԱՐԱՆ

Չորեքշաբթի, 25 Մայիս 2016ի առաւօտուն, Քուէյթի թեմի Առաջնորդ Գերայ. Տ. Մասիս Ծ. Վրդ. Զօպուեան Ազգային Առաջնորդարանի իր գրասենեակին մէջ ընդունեց Հ.Մ.Ը.Մ.ի Կեդրոնական Վարչութեան ատենապետ տիար Գառնիկ Մկրտիչեանը:

Հանդիպումին ներկայ գտնուեցաւ շրջանի վաստակաշատ Հ.Մ.Ը.Մ.ական տիար Յակոբ Պետիրեան:



Հանդիպման ընթացքին արծարծուեցան գաղութին առնչուող ծրագիրներն ու Հ.Մ.Ը.Մ.ի Կեդրոնական Վարչութեան յառաջիկայ ծրագիրները, մանաւանդ՝ 2018ին Միութեան 100ամեակի տօնակատարութեան պարագան: Գերայ. Տ. Մասիս Ծ. Վրդ. Զօպուեան բարձր գնահատեց միութեան աշխարհասփիռ գործունէութիւնը, յատկապէս Քուէյթի Մեկուսի Շրջանէն ներս:

Աւարտին Տիար Գառնիկ Մկրտիչեան Հ.Մ.Ը.Մ.ի յատուկ յուշանուէր մը յանձնեց Առաջնորդ Հայր Սուրբին:

## ՑԱԻԱԿՑՈՒԹԻՒՆ ՏԻՒՐԶԻ ՇԷՅՄԻՆ

Չորեքշաբթի 25 Մայիսի երեկոյեան Թեմիս Առաջնորդ Գերայ. Տէր Մասիս Ծ. Վրդ. Զօպուեան, ընկերակցութեամբ Տէր Հօր եւ Ազգ. Վարչութենէն Պրն. Բաֆֆի Աբիկեանի եւ Քրիստոնէայ եկեղեցիներու ներկայացուցիչներու, Լիբանանի Տիրազիներու նախկին գլխաւոր՝ Շէյխ Ալ Աբըլ Պահժադ Ղայթի մահուան առիթով, այցելեց Քուէթի Տիրազիներու Շէյխ Նասիպ Ալ Քանսային, յայտնելու համար իրենց ցաւակցութիւնները: Հանդիպման ընթացքին նաեւ զրոյց տեղի ունեցաւ կրօններու համագործակցութեան կարեւորութեան եւ դերին, առաջը առնելու ներկայ ծայրայեղական շարժումներու քանդիչ ու աղետաբեր արարքներուն:



## ԱՅՑԵԼՈՒԹԻՒՆ ԼԻԲԱՆԱՆԻ ՆՈՐ ԴԵՍՊԱՆԻՆ



Հինգշաբթի, 26 Մայիսի առաւօտուն թեմիս Առաջնորդ՝ Գերպ. Տէր Մասիս Ծ. Վրդ. Զօպուեան, ընկերակցութեամբ եկեղեցոյս հոգեւոր հովիւ՝ Արժ. Տէր Հօր եւ Ազգ. Վարչութենէն Պրն. Վահան Մարտիրոսեանի եւ Պրն. Բաֆֆի Արիկեանի այցելեց Քուէթի մօտ նորանշանակ Դեսպան Ն.Վ. Պրն. Մահեր Խայրին:

Բարի գալուստի պաշտօնական բաժնէն ետք, Գերպ. Հայր Սուրբը ամփոփ ձեռով

ներկայացուց Քուէթի հայութեան անցնող 60 տարիներու կեանքը, աշխատանքները, Ազգային Վարժարանի հաստատումն ու մշակութային, մարզական ու գեղարուեստական մարզի մէջ համայնքի իրագործումները:

Պրն. Դեսպանը հետաքրքրուած էր յատկապէս հայկական երգի եւ պարի արուեստներով. առաջարկեց, որ մեր գեղարուեստական ելոյթները նաեւ ընդգրկեն օտարներու ներկայութիւնը: Ի վերջոյ, Գերպ. Հայր Սուրբը յիշեց եկեղեցոյ ներկայ կացութիւնը եւ այդ պատճառով, համայնքին դիմագրաւած նիւթական դժուարութիւնները: Ան յաջողութիւն մաղթեց դեսպանին իր նոր առաքելութեան մէջ:

## ԱՆԿԼԻԳԱՆ ԵԿԵՂԵՑԻՈՅ ԱՌԱՋՆՈՐԴԻՆ ԱՅՑԵԼՈՒԹԻՒՆԸ ԱԶԳԱՅԻՆ ԱՌԱՋՆՈՐԴԱՐԱՆ

Երկուշաբթի, 23 Մայիս 2016-ի երեկոյեան թեմիս առաջնորդ Գերպ. Տ. Մասիս Ծ. Վրդ. Զօպուեան Ազգային Առաջնորդարանի իր գրասենեակէն ներս ընդունեց այցելութիւնը Կիպրոսի եւ Արաբական Օղջի Երկիրներու Անկլիզան եկեղեցոյ առաջնորդ՝ Միքայէլ Եպս. Լեւուսիսն, որուն ընկերացաւ Անկլիզան Եկեղեցոյ Քուէթի հոգեւոր հովիւ՝ Հարիսոն Զինագոմարը: Հանդիպումին ներկայ գտնուեցաւ նաեւ գաղութիս հոգեւոր հովիւ՝ Արժ. Տ. Արտակ Քինյ. Քէհեաեանը:



Անկլիզան եկեղեցոյ առաջնորդին բարի գալուստ մաղթելէ ետք Հայր Սուրբը անդրադարձաւ երկու եկեղեցիներու

յարաբերութիւններուն եւ երկար տարիներու բարեկամութեան եւ գործակցութեան: Անկլիզան Եկեղեցոյ առաջնորդը իր կարգին նաեւ անդրադարձաւ իր եկեղեցոյ եւ Մեծի Տանն Կիլիկիոյ Կաթողիկոսութեան պատմական եւ սերտ կապերուն՝ մանաւանդ միջ-եկեղեցական շրջանակներէն ներս: Ապա անոնք անդրադարձան շրջանի եկեղեցիները յուզող կարգ մը խնդիրներու եւ մտահոգութիւններու: Երկու կողմերը համաձայնեցան տեղական մակարդակի վրայ յաճախակի հանդիպումներով համագործակցութիւնը խորացնել: Հանդիպման ւարտին՝ Անկլիզան եկեղեցոյ առաջնորդը իր ողջոյնները փոխանցեց Մեծի Տանն Կիլիկիոյ Գահակալ՝ Ն.Ս.Օ.Տ.Տ. Արամ Ա. Կաթողիկոսին եւ յաջողութիւն մաղթեց Հայր Սուրբի աշխատանքներուն:

**ԼՈՒՐԵՐ ԱՆԹԻԼԻԱՍՏԻ ԿԱԹՈՂԻԿՈՍԱՐԱՆԷՆ**

**ՄԵԾԻ ՏԱՆՆ ԿԻԼԻԿԻՈՅ ԿԱԹՈՂԻԿՈՍՈՒԹԵԱՆ ՎԵՑ  
ՄԻԱԲԱՆՆԵՐ**

**ՍՏԱՑԱՆ ԾԱՅՐԱԳՈՅՆ ՎԱՐԴԱՊԵՏՈՒԹԵԱՆ ԱՍՏԻՃԱՆ**

Կիրակի, 22 Մայիս 2016-ին, Ս. Եւ Անմահ Պատարագի ընթացքին՝ Տերունական աղօթքէն առաջ, Մեծի Տանն Կիլիկիոյ Կաթողիկոսութեան Ս. Գրիգոր Լուսաւորիչ Մայր Տաճարին մէջ, ձեռամբ Լիբանանի Առաջնորդ Գերշ. Տ. Շահէ Եպս. Փանոսեանի Ծայրագոյն Վարդապետութեան աստիճան ստացան Շահինշահի Հոգեւոր Հովիւ Հոգշ. Տ. Անանիա Վրդ. Գուճանեան, Արաբական Միացեալ Էմիրութեանց եւ Քաթարի Թեմի Կաթողիկոսական Փոխանորդ Հոգշ. Տ. Մեսրոպ Վրդ. Սարգիսեան եւ Դպրեվանքի Տեսուչ Հոգշ. Տ. Թորգոմ Վրդ. Տօնոյեան:

Ծայրագոյն Վարդապետութեան աստիճանին արժանացած Գերապատիւ երեք Հայր Սուրբերը յաջորդաբար իրենց քարոզները խօսեցան, որոնք կեդրոնացան Մեծի Տանն Կիլիկիոյ Կաթողիկոսութեան ծառայութեան, հաւատարմութեան եւ Դպրեվանքին վրայ:



Պատարագի աւարտին Ն.Ս.Օ.Տ.Տ. Արամ Ա. Կաթողիկոս, երեք Ծայրագոյն Վարդապետները, Շահէ Սրբազանին եւ խարտաւիլակ Յուսիկ Ծայրագոյն Վարդապետին գլխաւորութեամբ, ընդունեց գրասենեակին մէջ, իր Հայրապետական թելադրանքները փոխանցեց եւ օրհնութիւնը տուաւ անոնց: Թեմերէն ժամանած հիւրեր ու բարերարներ եւս միացան եւ շնորհաւորեցին Հայր Սուրբերը:

Շաբաթ, 21 Մայիս 2016-ի առաւօտուն, Վեհաբանի Դահլիճին մէջ տեղի ունեցաւ աւարտաճառերու պաշտպանութիւն: Հայր Սուրբերը իրենց աւարտաճառերը ներկայացուցին ու պաշտպանեցին, Ն.Ս.Օ.Տ.Տ. Արամ Ա. Վեհափառ Հայրապետին ու Մեծի Տանն Կիլիկիոյ Կաթողիկոսութեան վանաբնակ միաբան հայրերու ներկայութեան: Աւարտաճառերը Մեծի Տանն Կիլիկիոյ Կաթողիկոսութեան արխիւէն առնուած նիւթեր էին, որոնք Հայր Սուրբերը վերձանած եւ ուսումնասիրութիւններ կատարած էին: Նորին Սրբութիւնը այս առիթով իր գնահատանքը յայտնեց կատարուած աշխատանքին համար, ինչպէս նաեւ իր նկատողութիւններն ու ցուցմունքները փոխանցեց:

Նշենք, որ աւարտաճառերու պաշտպանութեան ներկայ էին եւ եկեղեցական արարողութեան իրենց մասնակցութիւնը բերին Պոլսոյ Պատրիարքական Աթոռի միաբան Գերպ. Տ. Թաթուլ Ծ. Վրդ. Անուշեանը եւ Բրշ. Վաղարշակ Սրկ. Սերոբեանը:

Յայտնենք, որ Հիւսիսային Ամերիկայի տարբեր շրջաններու մէջ ծառայող երեք միաբաններ՝ Հոգշ. Տ. Գեղարդ Վրդ. Քիւսպէկեան-Թորոնթո, Հոգշ. Տ. Սահակ Վրդ. Եմիշեան-Ուսթըր եւ Հոգշ. Տ. Ղեւոնդ Վրդ. Բենթէզեան-Շիքսկո, իրենց ծառայած եկեղեցիներուն մէջ ստացան Ծայրագոյն Վարդապետութեան աստիճան:

ՀԱՅԿԱԿԱՆ

## Պիտի Հրապարակուի 10 Կարևոր Ապրանքներու Ներածման Փաստաթուղթերու Ցանկը

Տնտեսութեան նախարարութեան մէջ յառաջիկայ օրերուն պիտի հրապարակուին սպառողներու համար կարևոր 10 ապրանքներու ներածման համար անհրաժեշտ փաստաթուղթերու ցանկերը: 26 մայիսի կառավարութեան նիստին այս մասին յայտնած է տնտեսութեան նախարար Արծուիկ Մինասեան: Այդ փաստաթուղթերով ապրանքներ ներածել պիտի կարենայ ռեւէ ձեռներէց:

«Այդ ապրանքներն են կարագն ու արեւածաղիկի ձէթը, ալիւրն ու հացահատիկը, շաքարը, հաւի միսը, պաննոնն ու նարինջը, պենզիլը եւ տիզելը: Տնտեսութեան նախարարութիւնը առայժմ կը սահմանափակուի այս ապրանքներով, որոնք սպառողներուն համար ներմուծուող կարեւորագոյն ապրանքներ կը նկատուին: Բոլոր փաստաթուղթերուն հրապարակման համար ժամանակ կը պահանջուի, քանի որ իւրաքանչիւր ապրանքի համար կան քանի մը տարբեր ընթացակարգեր, ըստ առեւտուրի դրութեան:



Հայաստանի արտաքին առեւտուրը կը բաժնուի երեք մասերու՝ երրորդ երկիրներ առանց կանոնակարգման առանձնայատկութիւններու, երրորդ երկիրներ՝ ազատ առեւտուրի մասին պայմանագիրներով ու կանոնակարգման առանձնայատկութիւններով եւ վերջապէս՝ Եւրասիական միութեան երկիրներ», յայտնած է նախարարը:

Եւրասիական տնտեսական միութեան ծիրին մէջ եւս կայ երկու ցանկ. առաջինը՝ ապրանքներ ոչ զարգացած երկիրներէ, արտօնեալ դրութեամբ, երկրորդը՝ ապրանքներ զարգացող երկիրներէ, ուր կը կիրարկուին արտօնեալ տուրքեր:



Մինասեանի համաձայն, հաշուի առնելով փաստաթուղթերուն մեծ քանակը, սկիզբը պիտի հրապարակուի միայն 10 ապրանքներու վերաբերողը, բայց նախարարութիւնը հետագային պիտի հրապարակէ նաեւ սպառողական զամբիւղի մնացած ապրանքներուն վերաբերող փաստաթուղթերը:

Նշուած 10 ապրանքներուն վերաբերեալ փաստաթուղթերու ցանկերը ուղարկուած են Պետական եկամուտներու կոմիտէ ու Մանրամբէրքի անվտանգութեան պետական ծառայութիւն՝ անոնց համաձայնեցման համար: Մինչեւ շաբթուան աւարտը փաստաթուղթերը պիտի հրապարակուին

[www.mineconomy.am](http://www.mineconomy.am) կայքին վրայ: Բացի անկէ, պիտի մշակուի ծրագրային ապահովում, որով տնտեսութեան նախարարութեան կայքին վրայ կարելի պիտի ըլլայ որոնել ապրանքին քոտը, ըստ արտաքին տնտեսական գործունէութեան անուանացանկին:

## Ֆրանսուա Ռոշալյուան. «Ես Ղարաբաղի եմ. Մեզ Լռեցնելու Ազրայեճանի Բոլոր Փորձերը Ապարդիւն Պիտի Մնան»

«Արցախփրէս» կը հաղորդէ, թէ 24 մայիսին Լեռնային Ղարաբաղ այցելած են Ֆրանսայի խորհրդարանի անդամ, Ֆրանսա-Արցախ բարեկամութեան շրջանակի նախագահ Ֆրանսուա Ռոշալյուանն ու Ֆրանսա-Հայաստան բարեկամութեան խորհրդարանական խումբի նախագահ Ռընէ Ռուքէն, որոնք հանդիպումներ ունեցած են Լեռնային Ղարաբաղի նախագահ Բակո Սահակեանի, Ազգային ժողովի նախագահ Աշոտ Ղուլեանի եւ այլ անձնաւորութիւններու հետ:

Նախագահ Սահակեանի հետ տեղի ունեցած հանդիպումին ընթացքին քննարկուած են Արցախի եւ Ֆրանսայի խորհրդարաններու, հասարակական ու քաղաքական շրջանակներու միջեւ կապերու զարգացման առնչուող հարցեր: Անդրադարձ կատարուած է նաեւ Ազրայեճանական-ղարաբաղեան տագնապի լուծման եւ շրջանային գործընթացներուն:

Նախագահ Սահակեան երախտագիտութիւն յայտնած է հիւրերուն՝ երկիրներուն ու ժողովուրդներուն միջեւ բարեկամական յարաբերութիւններու ամրապնդման ուղղութեամբ տարուող մեծ եւ սկզբունքային գործունէութեան համար՝ զայն որակելով անկեղծ բարեկամութեան եւ մարդասիրութեան օրինակելի դրսեւորում:

Հանդիպումին մասնակցած են նաեւ Լեռնային Ղարաբաղի Ազգային ժողովի նախագահի տեղակալ Վահրամ Բալայեանը, պաշտօնատար այլ անձեր:

Անկէ ետք ֆրանսացի բարձրաստիճան պաշտօնատարները Լեռնային Ղարաբաղի Ազգային ժողովին մէջ հանդիպում ունեցած են օրէնսդիր եւ գործադիր իշխանութիւններու, գիտակրթական հաստատութիւններու եւ հասարակական կազմակերպութիւններու ներկայացուցիչներուն հետ:



Լեռնային Ղարաբաղի Ազգային ժողովի նախագահ, «Ղարաբաղ-Ֆրանսա» բարեկամութեան շրջանակի ղեկավար Աշոտ Ղուլեան՝ ողջունելով հիւրերը, բարձր գնահատած է «Ֆրանսա-Ղարաբաղ» բարեկամութեան ծիրին մէջ տարուող գործունէութիւնը՝ Արցախի մասին իրականութիւնը միջազգային հանրութեան ներկայացնելու առումով: Ա. Ղուլեան ողջունած է բարեկամութեան շրջանակի ղեկավար կազմին կողմէ տրուած որոշումը՝ Արցախ այցելելու եւ տեղւոյն վրայ տեղեկութիւններ

ունենալու ազրայեճանական յարձակման իբրեւ հետեւանք ստեղծուած կացութեան մասին:

Ան հաստատած է, որ անկախ նետուած մարտահրաւերներու ձեւէն եւ բովանդակութենէն, Արցախ կը շարունակէ պայքարը՝ յանուն ժողովրդավարական արժէքներու եւ ազատութեան, եւ այդ պայքարին մէջ կարելոր նկատած է նոյն արժեհամակարգը կրող ժողովուրդներու, նաեւ միջազգային հանրութեան աջակցութիւնը:

Ֆրանսուա Ռոշպլուան ըսած է. «Ես դարաբաղցի եմ: Այսօր մենք աւելի քան երբեւէ համերաշխ ենք Արցախին հետ, եւ մեզ լռեցնելու Ազրայէճանի բոլոր փորձերը ապարդիւն պիտի մնան: Եթէ ես նախապէս կ'ըսէի, որ Ազրայէճան ունի ահաբեկչական պետութեան կեցուածք, ապա ապրիլեան դէպքերէն ետք հաստատ կերպով կը յայտարարեմ՝ Ազրայէճան ահաբեկչական պետութիւն է: Ազրայէճանի գործողութիւնները, որոնք նպատակ ունին լուծարելու Ֆրանսայի եւ Արցախի շարք մը քաղաքներուն միջեւ ստորագրուած բարեկամական համաձայնագիրները, մեզ կը մղեն աւելի համախմբուած ըլլալու: Արցախցիները կրնան նկատի ունենալ, որ մենք լիովին կ'աջակցինք ու կը զօրակցինք իրենց»:



Ան մտահոգութիւն յայտնած է ազրայէճանական յարձակումներուն իբրեւ հետեւանք Արցախի մէջ զոհուած զինուորներուն եւ քաղաքացիներուն ճակատագիրին զծով՝ նկատել տալով, որ անոնք զոհուած են անընդունելի պայմաններու մէջ:

«Ոգեւորիչ է, որ հակառակ այս բոլորին, բազմաթիւ արցախցիներ ապրիլեան զինուորական գործողութիւններու առաջին իսկ օրերէն կամաւորագրուեցան հայրենիքի եւ ազատութեան պաշտպանութեան ի խնդիր: Մենք այցելեցինք սահմանամերձ

Թալիշ եւ Մատաղիս, ուր հանդիպեցանք զինուորականներու, որոնք վստահօրէն ու հանգիստ կերպով իրենց գործը կը կատարեն: Այդ ոգեւորութիւնն ու մեր տեսածը մենք կը փոխանցենք մեր միւս խորհրդարանականներուն, կառավարութեան ու Եւրոպական հարցերու քարտուղարին», նշած է Ֆրանսուա Ռոշպլուան՝ ողջունելով Մինսքի խմբակի համանախագահներուն ջանքերը՝ խաղաղ ուղիով հարցը լուծելու ուղղութեամբ:

Ֆրանսացի երեսփոխանը յոյս յայտնած է, որ Յունիսին Հայաստանի եւ Ազրայէճանի ղեկավարներու նախատեսուող հանդիպումին ընթացքին իսկական արդիւնքներ արձանագրուին:

Ռընէ Ռուքէն ըսած է, որ իրենք մօտէն կը հետեւին Արցախի մէջ տեղի ունեցող իրադարձութիւններուն եւ միշտ անոր կողքին պիտի ըլլան: «Ամէն ինչ պիտի ընենք՝ իրականութիւնը տեղ հասցնելու համար», ըսած է ան՝ աւելցնելով, որ իրենց քարոզչական աշխատանքէն ետք եւրոպացի գործընկերներէն շատեր արդէն շատ բան զիտեն Արցախի մասին:

«Այդ ջանքերուն շնորհիւ Եւրոպական խորհուրդի Խորհրդարանական վեհաժողովին քննարկման չեն դրուած այն բանաձեւերը, զորս Ազրայէճան ներկայացուցած է ապրիլեան յարձակման օրերուն, երբ կը ռմբակոծուէին Արցախի բնակելի շրջանները», յայտնած է Ռընէ Ռուքէն՝ աւելցնելով, որ արդէն նկատելի է ազրայէճանական կողմէ յարձակողական կեցուածքը, որ պիտի ուղղուի ինքնին Ազրայէճանի դէմ:

[www.aztagdaily.com](http://www.aztagdaily.com)

## **Հայկական Քաղաքական Կուսակցություններ. «Կը Հայաստանանք Ապրիլեան Պատերազմին Լեռնային Ղարաբաղի Պետական Կառոյցներու Կազմակերպութեամբ Եւ Բանակին Արիութեամբ»**

Հայկական քաղաքական կուսակցություններու երկրորդ համաժողովին մասնակիցները ժողովի աւարտին հրապարակած են յայտարարութիւն մը, որուն մէջ անդրադարձած են համաժողովին ընթացքին քննարկուած հարցերուն՝ շեշտը դնելով այն իրողութեան վրայ, որ կուսակցությունները մնայուն նեցուկ են Լեռնային Ղարաբաղի տագնապի խաղաղ ուղիով լուծման բոլոր ջանքերուն:

«Մենք՝ 21-22 մայիսին Ստեփանակերտի մէջ տեղի ունեցած Հայկական կուսակցություններու երկրորդ համաժողովին մասնակիցներս՝ կարելոր նկատելով Հայաստանի եւ Լեռնային Ղարաբաղի Հանրապետություններու քաղաքական համակարգերու հետագայ զարգացումը, ժողովրդավարական արժէքներու հետեւողական ներդրումը, մարդու հիմնարար ազատություններու եւ իրաւունքներու պահպանումը, կուսակցություններու համագործակցութիւնը եւ քննարկումները համահայկական նշանակութեան, որուն կարգին՝ ղարաբաղեան տագնապի խաղաղ լուծման եւ Լեռնային Ղարաբաղի միջազգային ճանաչման հարցերով, քաղաքական գործունէութեան կազմակերպումն ու գործադրութիւնը բացառապէս Լեռնային Ղարաբաղի Հանրապետութեան եւ Հայաստանի Հանրապետութեան Սահմանադրություններու շրջագիծին մէջ, կը հպարտանանք ապրիլեան պատերազմին ընթացքին Լեռնային Ղարաբաղի պետական կառոյցներուն կազմակերպութեամբ եւ պաշտպանութեան Բանակին ցուցաբերած արիութեամբ, անձնագոհութեամբ ու յաղթական ոգով եւ մեր ամբողջ ժողովուրդին դրսեւորած միասնականութեամբ», ըսուած է յայտարարութեան մէջ:

Համաժողովի մասնակիցները դատապարտած են ազրպէյճանական զինուորական յարձակումը եւ ահաբեկչական գործողությունները ընդդէմ Լեռնային Ղարաբաղին եւ հայ ժողովուրդին, ինչպէս նաեւ՝ պետական մակարդակով որդեգրուած հայատեացութեան ու անհանդուրժողականութեան քաղաքականութիւնը:

Ընդգծելով, որ կուսակցությունները քաղաքացիներուն քաղաքական, իրաւական, ընկերային, մարդասիրական, տնտեսական եւ այլ իրաւունքներու լաւագոյն արտայայտողներն են, համաժողովին մասնակիցները հաստատած են, որ կուսակցությունները Հայաստանի եւ Ղարաբաղի ներքին եւ արտաքին մարտահրաւերներուն լիարժէքօրէն դիմակայելու նպատակով յաւելեալ ջանք ի գործ պէտք է դնեն իրենց մտաւորական, կազմակերպչական, կառուցուածքային եւ այլ կարողություններն ու կարելիությունները ընդարձակելու համար:

«Կարելոր կը նկատենք քաղաքական համերաշխութիւնն ու հասարակական համախմբութիւնը ազգային անվտանգութեան վերաբերող հիմնախնդիրներու, մասնաւորապէս, ղարաբաղեան տագնապի՝ միջազգային իրաւունքի հիման վրայ լուծման նպատակով: Կ'ամրագրենք, որ արտաքին քաղաքականութեան մարզին մէջ Հայաստանի եւ Լեռնային Ղարաբաղի համար ռազմավարական տարողութիւն ունեցող հարցերուն մէջ կուսակցություններուն ընդգրկուն համագործակցութիւնը անհրաժեշտութիւն է:

Առաջնահերթություն կը նկատենք նման համագործակցություն աշխուժորեն օգտագործելը՝ մեզի հասանելի միջազգային բոլոր հարթակներու վրայ», նշուած է յայտարարութեան մէջ:

Պատգամաւորները վերահաստատած են նման ձեւաչափով քննարկումներու կարեւորութիւնը եւ պատրաստակամութիւնը յայտնած զանոնք պարբերական դարձնելու եւ մնայուն կերպով կազմակերպելու Ղարաբաղի մէջ՝ ներառելով կուսակցական կառոյցներու կարելի եղածին չափ լայն շրջանակ՝ կանանց կազմակերպութիւններ, երիտասարդական թելեր, մասնագէտներ եւ այլն»:

Յայտարարութիւնը ստորագրած են Հայաստանի Հանրապետական, «Ազատ դեմոկրատներ», «Ազատ հայրենիք», «Ազատութիւն», «Ազգային միաբանութիւն» կուսակցութիւնները, Արցախի ժողովրդավարական կուսակցութիւնը, Բարգաւաճ Հայաստան կուսակցութիւնը, Հայ յեղափոխական դաշնակցութիւնը եւ ՀՅԴ Արցախի կառոյցը, Հայաստանի Քրիստոնեայ-դեմոկրատական միութիւնը, «Հօր հայրենիք», «Միացեալ ազատական ազգային» եւ Վերակազմեալ սոցիալ-դեմոկրատ հնչակեան կուսակցութիւնները:

## Ալիեւ Եւ Էրտողան Քննարկած Են Լեռնային Ղարաբաղի Տագնապը



Ազրպէյճանական «Թրենտ» լրատու գործակալութիւնը կը հաղորդէ, որ Պոլսոյ մէջ տեղի ունեցած Թուրքիոյ նախագահ Ռեճեփ Թայիփ Էրտողանի եւ Ազրպէյճանի նախագահ Իլհամ Ալիեւի հանդիպումը:

Անոնք երկկողմանի յարաբերութիւններուն առնչուող հարցերու կողքին քննարկած են նաեւ Լեռնային Ղարաբաղի տագնապի լուծման հարցը:

Ալիեւ Պոլիս մեկնած է՝ մասնակցելու համար 23-24 Մայիսին տեղի ունեցող ՄԱԿ-ի մարդասիրական հարցերով երկօրեայ վեհաժողովին:

Թրքական «Սապահ» օրաթերթի կայքը հրապարակած է վեհաժողովի ընթացքին Ալիեւի արտասանած խօսքին՝ Ղարաբաղին վերաբերող հատուածը:

Ալիեւ դարձեալ յառաջ քաշած է Ազրպէյճանի հողերուն 20 առ հարիւրին գրաւուած ըլլալուն եւ շուրջ 1 միլիոն ազրպէյճանցի տեղահանուածներու գոյութեան մասին թեզերը: Ապրիլի առաջին օրերուն իր երկրին կողմէ շղթայազերծուած պատերազմին մասին խօսելով՝ Ալիեւ Հայաստանը մեղադրած է պատերազմի սկսելու յանցանքով:

«Ապրիլեան յարձակումներուն ընթացքին զոհուեցան մեր զինուորներն ու խաղաղ բնակիչները: Ամբողջութեամբ կամ մասամբ վնասուեցաւ 500 տուն: Լեռնային Ղարաբաղի եւ մնացեալ 7 շրջանները կը մնան բռնագրաւուած: ՄԱԿ-ի կողմէ որդեգրուած որոշումներն ալ կը մնան թուղթի վրայ, չեն կիրարկուիր: Հայաստանի պատճառով ստեղծուած մարդասիրական ճգնաժամին պատճառով իրենց տուները լքած տեղահանուածներուն համար 6 միլիառ տոլար ծախսած ենք», ըսած է Ալիեւ:



## Նալբանդեան. «Առանց Լեռնային Ղարաբաղի Մասնակցության Անկարելի Կ'ըլլայ Որեւէ Փաստաթուղթի, Համաձայնագիրի Ստորագրումը»

26 Մայիսին գումարուած Ազգային ժողովի նիստին նախարար Էդուարդ Նալբանդեան խօսք առնելով անդրադարձած է Լեռնային Ղարաբաղի եւ Հայաստանի յարաբերութիւններուն, Լեռնային Ղարաբաղի առնչուող զարգացումներուն:

Էդուարդ Նալբանդեան յայտնած է, որ Հայաստան եւ Լեռնային Ղարաբաղ պիտի շարունակեն միջազգային կազմակերպութիւններուն ներկայացնել Ազրայէճանի անմարդկային գործողութիւնները: «Վստահաբար, Հայաստանն ու Ղարաբաղը ներկայացուցած են եւ կը ներկայացնեն մարդու իրաւունքներու համապատասխան մարդասիրական համաձայնագիրներու ոտնահարումները: Ինչպէս գիտէք, հոլովոյթը պարզ չէ, սակայն մեր կողմէ կը կատարուի ամէն կարելի բան, որպէսզի այդ կազմակերպութիւնները տեղեկանան ամէն բանի մասին եւ համապատասխան արձագանգ տան», ըսած է ան:



Վիեննայի մէջ տեղի ունեցած Հայաստանի եւ Ազրայէճանի նախագահներուն հանդիպումին մասին հարցումի մը պատասխանելով՝ նախարարը ըսած է, որ այդ ատեն ոչ մէկ փաստաթուղթ ստորագրուած է, իսկ այդ մասին տարաձայնութիւնները իրականութեան հետ առնչութիւն չունին: «Որեւէ ստորագրութեան մասին ոչ միայն վաղաժամ է խօսիլը, այլեւ անիմաստ: Որեւէ փաստաթուղթ չկայ, որ ստորագրուի: Նախարարը նշած է, որ բանակցութիւններու վերսկսման համար պէտք է ապահովուին համապատասխան պայմաններ: «Եթէ ստեղծուի դիտարկումի մեքանիզմներու ներդրման կարելիութիւն ու ընդլայնուին ԵԱՀԿ-ի նախագահի անձնական ներկայացուցիչի գրասենեակի կարողութիւնները, այսինքն՝ բացառուին այնպիսի զարգացումներ, որ եղան ապրիլ ամսուան սկիզբը, ապա կարելիութիւններ կան վերսկսելու այդ բանակցութիւնները», դիտել տուած է Էդուարդ Նալբանդեան:

Պատասխանելով Բարգաւաճ Հայաստան խմբակցութեան ղեկավար Նայիրա Զոհրաբեանի հարցումին՝ ան ըսած է, որ Հայաստանի եւ Լեռնային Ղարաբաղի միջեւ ռազմական փոխօգնութեան համաձայնագիրը մշակման փուլի մէջ է: «Ճիշդ էք, համաձայնագիրի պատրաստութիւնը յանձնարարուած է արտաքին գործոց նախարարութեան, անիկա մշակման փուլին մէջ է: Յաջորդ քայլերը կախուած կ'ըլլան ապագայ զարգացումներէն եւ համապատասխան գործօններէն: Այսքանն է, որ ես այսօր կրնամ ըսել», ըսած է նախարարը: Ան աւելցուցած է, որ այս ոչ այնքան պարզ գործընթացներուն առնչութեամբ Հայաստանի եւ Լեռնային Ղարաբաղի բարձրագոյն իշխանութիւնները քննարկումներ կը կատարեն եւ անոնց իբրեւ արդիւնք կու գան եզրակացութեան՝ երբ կարելի ըլլայ ատիկա իրականացնել: Նայիրա Զոհրաբեան արձագանգելով հարցուցած է. «Խորհրդարանը Արցախի ճանաչումը այս պահուն նկատեց ոչ ճիշդ: Հաշուի առնելով ձեր նշած խնդիրները, փաստօրէն նոյն դրութեամբ կ'ընթանայ զինուորական փոխօգնութեան համաձայնագիրը պատրաստելու ընթացքը, այսինքն՝ հաւանական է, որ չգայ զանիկա ընդունելու պատեհ պահը»: Ի պատասխան Էդուարդ Նալբանդեան նշած է. «Ես նոյն հաւասարութեան վրայ չէի դներ այդ երկու հարցերը: Չէի օգտագործեր «նոյն դրութեամբ» կամ այլ բառակապակցութիւններ: Ես կ'ըսեի՝ այդ համաձայնագիրի մշակման եւ կնքման հետ կապուած հարցերը կը գտնուին մեր օրակարգին վրայ»:

**ՄԻՋԱԶԳԱՅԻՆ**

**«Թուրքիան Պէտք է Կատարէ Բոլոր Համաձայնութիւնները՝ Եւրոպական Միութեան Հետ Ազատ Մուտքի Արտօնագիրի Անցնելու Համար» Ըսաւ Մերքել**



ԹԱՍՍ լրատու գործակալութիւնը կը հաղորդէ, որ Գերմանիոյ վարչապետ Անկէլա Մերքել Պոլսոյ մէջ Թուրքիոյ նախագահ Ռեճեփ Թայիփ Էրտողանի հետ բանակցութիւններու աւարտին յայտարարած է, որ Թուրքիոյ ղեկավարութիւնը պէտք է կատարէ նախապէս Եւրոպական Միութեան նշած բոլոր կէտերը՝ մուտքի արտօնագիրի դրութեան ազատականացման համար, այլապէս այդ երկրին եւ Եւրոպական Միութեան միջեւ մուտքի արտօնագիրի դիրացումը ուժի մէջ պիտի չմտնէ:


«Ես հասկցուցած եմ, որ դէպի ազատ մուտքի արտօնագիր տանող ճամբան հիմնուած է 72

կէտերուն վրայ: Անոնք նորութիւն չեն: Եւրոպական Միութիւնը զանոնք արդէն ներկայացուցած է դեկտեմբեր 2013-ին: Մենք կը պահանջենք, որ իրագործուին բոլոր կէտերը՝ ազատ մուտքի արտօնագիրի դրութիւն տրամադրելու համար», ըսած է Մերքել:

Ներկայիս Եւրոպական Միութիւնը «կասեցուցած» է Թուրքիոյ հետ մուտքի արտօնագիրի դրութեան ազատականացման հոլովոյթը, որովհետեւ Թուրքիան մինչեւ հիմա 72 պահանջներէն միայն 5-ը կատարած է:

**Ժաաֆարի. «Սուրիոյ Մէջ Ահաբեկչական Զինեալները Կը Գործեն Սէուտական Արաբիոյ, Թուրքիոյ Եւ Քաթարի Թելադրանքով»**

«Վեսթի» կը հաղորդէ, որ ՄԱԿ-ի մէջ Սուրիոյ մնայուն ներկայացուցիչ Պաշար Ժաաֆարի յայտնած է, որ Ժապհաթ Նուսրա եւ Ահրար Շամ ահաբեկչական խմբաւորումներու զինեալները կը գործեն Սէուտական Արաբիոյ, Թուրքիոյ եւ Քաթարի արմատական վարչակարգերուն թելադրանքով:



Ժաաֆարի ՄԱԿ-ի ընդհանուր քարտուղարին եւ Ապահովութեան խորհուրդի նախագահին յղած իր նամակին մէջ յայտնած է, որ 12 Մայիս 2016-ին նշեալ խմբաւորումներուն ահաբեկիչները յարձակած են Համա նահանգին մէջ գտնուող Զարա բնակավայրին դէմ, գերեվարած կիները եւ սպաննած, տարբեր տուեալներու համաձայն, 70-100 խաղաղ բնակիչ:

## Թարթուսի Եւ Ժապլէի Մէջ Ականահարումներ Աւելի Քան 100 Զոհ Պատճառեցին



ՄԱՆԱ լրատու գործակալութիւնը հաղորդեց, որ երեք ականահարումներ հարուածած են Թարթուս քաղաքը, ուր արձանագրուեցան աւելի քան 80 զոհ: Իսկ Լաթաքիոյ գիւղական շրջանի Ժապլէ քաղաքին մէջ միաժամանակ երկու ականահարումներ տեղի ունեցած են:

Թարթուսը հարուածած ականահարումները Սուրիոյ տագնապին սկիզբէն ի վեր իրենց տեսակին մէջ առաջինն էին: Ժապլէն եւ Թարթուսը հարուածած ականահարումները հաւասարապէս թիրախ դարձուցին փոխադրակառքերու կայարաններ:

Սուրիոյ տեղեկատուութեան նախարար Օմրան Զոդայի մեկնաբանելով ականահարումները «Մայատին» արբանեակային պատկերասփիւռի կայանին յայտնեց. «Այս դէպքերուն ետին թրքական, ծոցի, սեւուտական եւ քաթարական դերակատարութիւն գոյութիւն ունի»:

## Թուրքիա Կը Սպառնայ Խզել Եւրոպական Միութեան Հետ Բոլոր Համաձայնագիրները

Թրքական «Թ.Ռ.Թ.Հապեր» պատկերասփիւռի կայանը կը հաղորդէ, որ Թուրքիոյ նախագահի խորհրդական Եիդիթ Պուլուր յայտարարած է, որ Թուրքիան կրնայ դադրեցնել Եւրոպական Միութեան հետ իր բոլոր համաձայնագիրները, ներառեալ անոնք, որոնք կը վերաբերին մաքսային միութեան, եթէ Պրիւսէլ Անգարայի հետ բանակցութիւններուն մէջ շարունակէ երկակի չափանիշերու քաղաքականութիւնը:



Թուրքիան Եւրոպական Միութեան հետ մաքսային միութեան համաձայնագիրը ստորագրած է 1996-ին: Վերջերս Անգարան կը փորձէ իրեն ձեռնտու կերպով վերատեսութեան ենթարկել այդ համաձայնագիրը:

ԱՆՂԱԴԱՐ

## Կրկնակիորէն Իւրայատուկ

18 Մայիսին Չիլիի խորհրդարանը որդեգրեց «Լեռնային Ղարաբաղի Հանրապետութեան դէմ Ազրպէյճանի զինեալ յարձակումը դատապարտող Չիլիի խորհրդարանի բանաձեւի նախագիծը»: Բանաձեւը աննախադէպ է, որովհետեւ յստակ կերպով կը նշէ նախադարձակ կողմը: Իբրեւ յստակօրէն հասցեագրուած բանաձեւ, անիկա իր տեսակին մէջ առաջինը ըլլալու իրողութենէն անկախ՝ նաեւ ունի այլ իւրայատկութիւններ:



*Estimado en sesión N°10, el 7 de abril de 2016, siendo la 12:05 horas, por el diputado señor HASBUN.*

PROYECTO DE RESOLUCIÓN POR EL CUAL LA CÁMARA DE DIPUTADOS DE CHILE CONDENA EL ATAQUE ARMADO DE AZERBAIYÁN A LA REPÚBLICA DE NAGORNO KARABAGH.

Բանաձեւին մէջ «Լեռնային Ղարաբաղի Հանրապետութիւն» բառակապակցութիւնը նշուած է 4 անգամ: Ի տարբերութիւն հայերէն կարգ մը թերի թարգմանութիւններու, սպաներէն բնագիրին մէջ ոչ մէկ տեղ Լեռնային Ղարաբաղի անունին կը հանդիպինք առանց անոր կցուած «հանրապետութիւն» եզրին. իրողութիւն մը, որ կու գայ ընդգծելու «Լեռնային Ղարաբաղի Հանրապետութիւն» բառակապակցութեան օգտագործման ոչ պատահական-դիտաւորեալ բնոյթը: Այլ խօսքով՝ Չիլիի խորհրդարանին կողմէ որդեգրուած բանաձեւը Ազրպէյճանի շղթայագերծած նախադարձակումը դատապարտող բանաձեւ մը չէ միայն, այլ նաեւ՝ Չիլիի կողմէ Լեռնային Ղարաբաղի Հանրապետութեան ճանաչման անուղղակի յայտարարութիւն մը:

Արցախի անկախութեան միջազգային ճանաչման հոլովոյթը մեծ հանգոյց մըն է, իսկ այդ կծիկը քակելու թելը կը գտնուի Հարաւային Ամերիկայի ցամաքամասին մէջ: Մարդկային իրաւանց եւ ժողովուրդներու ինքնորոշման իրաւունքին յանձնառու, յառաջադէմ գաղափարներու տէր Ուրուկուէյի, Պոլիվիոյ եւ Չիլիի նման երկիրներու ճամբով է, որ այդ ձիւնագնդակը պիտի սկսի գլորիլ եւ մեծնալ: Ուրուկուէյն էր այն առաջին երկիրը, որ ճանչցաւ Հայոց ցեղասպանութիւնը: 1965-էն 17 տարի ետք՝ 1982-ին էր, որ երկրորդ երկիր մը՝ Կիպրոսը ճանչցաւ Հայոց ցեղասպանութիւնը: Այսօր երկու տասնեակէ աւելի երկիրներ պաշտօնապէս ճանչցած են Հայոց ցեղասպանութիւնը: Պատմութիւնը ինքզինք կրկնելու սովորութիւնը ունի եւ ոչինչ կ'արգիլէ, որ այդ սովորութիւնը շարունակուի: Մեր պարտականութիւնը ընդամենը մեր ջանքերը Հարաւային Ամերիկայի վրայ կեդրոնացնելով՝ պատմութեան սովորամոլութիւնը խթանելն է:

**ԱՌՈՂՋԱՊԱՀԱԿԱՆ**

## **Կեռասն Ու Խնձորը Գիրութեան Դէմ**

Ո՞վ ըսաւ, որ բոլոր աղանդերները պատճառ կը դառնան գիրութեան: Ան, ով որ այս հաստատումը կ'ընէ, նկատի չէ առած կարմիր գոյնի պտուղի տեսակները, ի մասնաւորի՝ խնձորն ու կեռասը:

Ըստ վերջին գիտական ուսումնասիրութիւններուն, խնձորն ու կեռասը ոչ միայն գիրութիւն չեն պատճառեր, այլեւ կը պաշտպանեն մարմինը գիրութենէն, կամ կը կանխեն գիրութիւնը, որ ծանօթ է «Ախտանշանային փոխարկութիւն» (Metabolic Syndrome) անունով:

## **Օրական Մէկ Խնձորը Կը Պաշտպանէ Սրտանօթային Հարցերէ**

Արդեօք գիտնականները յայտնութի՞ւն մը կատարած են կեռասին եւ խնձորին՝ գիրութեան բարդութիւններուն դէմ պայքարելու դերին առնչութեամբ: Պատասխանը այո է: Անոնք փաստած են, որ կեռասն ու խնձորը ոչ միայն կը նուազեցնեն գիրութիւնը, այլեւ կը կանխեն զանազան հիւանդութիւններ, ինչպէս սրտանօթային հարցերը եւ շաքարախտը, որոնք անմիջական առնչութիւն ունին գիրութեան հետ:



Գիտնականները այս եզրակացութեան յանգած են փորձարկութիւններ կատարելով երկու խմբակի չափահասներու վրայ: Առաջին խմբակի չափահասները օրինաւոր ձեւով խնձոր սպառողներն են, իսկ երկրորդ խմբակի չափահասները երբեք խնձոր չսպառողներն են: Առաջին խմբակին մօտ ի յայտ եկած է, որ «Ախտանշանային փոխարկութիւն» ունենալու տոկոսը 27 առ հարիւրով նուազած է՝ բաղդատած երկրորդ խմբակին:

Խնձորի սպառումը կը նուազեցնէ սրտանօթային ճնշումը 30 առ հարիւրով, ինչպէս նաեւ 20 առ հարիւր կամ աւելի տոկոսով կը նուազեցնէ մէջքի չափը, որ գործօն մըն է սրտանօթային հիւանդութեան, յառաջացման մէջ:

Միւս կողմէ, ան, ով որ մեծ քանակութեամբ խնձոր կը սպառէ, անոր մօտ կը նուազի սպիտի (protein)է կենսանիւթ Մէ-ի քանակը:

Մէկ խնձորը ինչպէ՞ս կրնայ կանխարգիլել առողջութեան սպառնացող վտանգը: Այդ ազդեցութիւնը կ'ըլլայ անուղղակի ձեւով: Ազդեցութիւնը մեծ է ի մասնաւորի այն անհատներու մօտ, որոնք ընդհանրապէս կը հետեւին առողջ եւ հաւասարակշռուած սննդականոնի, որ հարուստ է պտուղով, բնաթելով, կենսանիւթով, քալսիումով եւ փոթասիտով, սակայն աղքատ է վնասակար ճարպով եւ շաքարով:

## Կեռասի Օգուտը

Գիտնականներ նաեւ կատարած են ուսումնասիրութիւններ՝ կեռասին օգտակարութիւնը ու մարմնին վրայ անոր դրական ազդեցութիւնը յայտնաբերելու համար: Անոնք նկատեցին, որ կեռասին օրական սպառումը, առողջ եւ քիչ ճարպ պարունակող սննդականոնի կողքին, կը նուազեցնէ սրտանօթային հիւանդութիւն ունենալու հաւանականութիւնը: Այս ուսումնասիրութիւնը անոնք կատարած են մուկերու վրայ՝ որոնք ժառանգական տուեալներով բարձր հաւանականութիւն ունին նմանօրինակ հիւանդութիւն ունենալու:



Իրենց ուսումնասիրութիւնը աւելի յառաջ տանելով՝ գիտնականներ ուսումնասիրութիւն կատարեցին գիրնալու հաւանականութիւն ունեցող մուկերու վրայ՝ անոնց օրական հերթականութեամբ տալով մէկուկէս գաւաթ կեռասի փոշի, ճարպով հարուստ ուտելիքի կողքին: Արդիւնքը եղաւ այն, որ հակառակ 90 օր ճարպով հարուստ ուտելիք սպառելուն, մուկերը ոչ միայն գիրութեան նշաններ ցոյց


չտուին, այլեւ ճարպին քանակը նուազեցաւ անոնց մօտ: Նուազեցան նաեւ քոլէսթերոլին, թրիկլիսթերիտին եւ կլիւքոզին քանակները անոնց արեան մէջ: Միւս կողմէ, TNF-Alpha-ի եւ Interleukine

6-ի չափանիշները քննելով՝ ի յայտ եկաւ, որ կեռասը ունի տուեալ մը եւս՝ բորբոքումներու դէմ դնելու յատկութիւնը:

**ՔԱՐԼԱ ԵԱՐՏՆՄԵԱՆ**

ԱՅԼԱԶԱՆ

## «Մաքրության» Հասկացողությունը Արեւելեան Փիլիսոփայութեան Մէջ



Արեւելեան փիլիսոփայութեան մէջ «մաքրութիւն» հասկացողութիւնը մի միայն մարմինն չի վերաբերիր, այլ նաեւ՝ հոգիի, միտքերու եւ արարքներու մաքրութեան:

\*\*\*

«ՉԵՌՔԵՐՈՒ ՄԱՔՐՈՒԹԻՒՆ» կը նշանակէ՝ չառնել այն, ինչ մեզի չի պատկանիր: Միայն է բարեկցութիւն ձեռք բերել ուրիշի հաշուոյն: Եթէ մեզի չպատկանող գումար մը ձեռք բերենք խաբէութեամբ,

անպարկեշտութեամբ, ինքնաբերաբար կ'աղտոտենք մեր մարմինն ու հոգին:

\*\*\*

«ԱԿԱՆՋՆԵՐՈՒ ՄԱՔՐՈՒԹԻՒՆ» կը նշանակէ՝ պէտք չէ ականջ կախել չար, գոռոզ եւ դառնացած մարդոց խօսքերուն, ինչպէս նաեւ անհրաժեշտ է, որ խուսափինք բամբասանքներ եւ չարախօսութիւններ լսելէ:

\*\*\*

«ԱԶՔԵՐՈՒ ՄԱՔՐՈՒԹԻՒՆ» ըսելով՝ պէտք է հասկնալ, որ կարելի չէ նախանձոտ տենչանքով նայիլ ուրիշին ունեցուածքին, կարելի չէ ապականել աչքերը՝ բռնութեան եւ դաժանութեան տեսարաններ դիտելով:

\*\*\*

«ԲԵՐԱՆԻ ՄԱՔՐՈՒԹԻՒՆ» կը նշանակէ՝ չաղտոտել բերանը շատախօսութեամբ, չարախօսութեամբ, հայհոյանքներով: Մեր խօսքի չար երանգները կ'ապականեն մեր մարմինն ու կեանքը:

\*\*\*

«ՄԱՐՄԻՆԻ ԵՒ ՀԱԳՈՒՍԻ ՄԱՔՐՈՒԹԻՒՆ»-ը կը նշանակէ, որ պէտք է ուշադրութիւն դարձնենք մեր արտաքին տեսքին: Մաքուր եւ խնամուած տեսք ունենանք միշտ, որպէսզի մեր շրջապատին հաճելի ըլլայ մեզի նայիլը:

\*\*\*

«ՄՏՔԵՐՈՒ ՄԱՔՐՈՒԹԻՒՆ»-ը կ'ենթադրէ, որ ձերբազատինք բացասական եւ կործանող միտքերէն եւ տեղ բանանք դրական եւ ստեղծագործ գաղափարներուն:

\*\*\*

«ՀՈԳԻՒ ԵՒ ՍԻՐՏԻ ՄԱՔՐՈՒԹԻՒՆ» մեր հոգին մեր ունեցած ամենամաքուր ու լուսաւոր բանն է: Չանտեսենք անոր պողոթնումները եւ առաջնորդուինք բարի սկզբունքներով: Սիրենք եւ փոխարէնը ոչինչ չպահանջենք: Մերը ինքնին երջանկութիւն է:

*ՄԱՆԿԱԿԱՐԺԱԿԱՆ*

## Լուիզա Ղամբարեանի Կարծիքով. «Երեխան Սպունգի Նման Է. Ի՛նչ Տաս, Այդ Կ՛ընդունի»



«Երաժշտութիւնը շատ կարեւոր դեր ունի երեխաներու դաստիարակութեան մէջ: Երաժշտութիւնը կ'օգնէ լիարժէք բացայայտել երեխաներու ընդունա կութիւնները, զարգացնել երաժշտական լսողութիւնն ու կշռոյթի զգացողութիւնը»: Ահա այս խօսքերով դերասանուհի Լուիզա Ղամբարեան կը շեշտէ երեխայի մը երաժշտական դաստիարակութեան կարեւորութիւնը՝ «Երեւան նիուզ»-ի հետ հարցազրոյցի մը ընթացքին:

Դերասանուհին կարծիքով, գիտակից սերունդ ձեւաւորուելու համար անհրաժեշտ պայմաններ պէտք է ստեղծել, իսկ երեխային ընդհանուր

ճաշակի ձեւաւորման մէջ ազգային երաժշտութիւնը մեծ դերակատարութիւն ունի: Ղամբարեան կ'աւելցնէ. «Երեխան մինչեւ որ կարենայ ընկալել եւ սիրել թատրոնը, շարժապատկերի արուեստը եւ արուեստի այլ տեսակները, անոր ընկալողական դաշտին մէջ առաջին տեղը կը գրաւէ երաժշտութիւնը: Շատ կարեւոր է, թէ ի՛նչ կը լսէ երեխան»:

Ապա անձնական փորձառութենէն պատմելով՝ դերասանուհին կը յայտնէ, թէ իր 10 տարեկան աղջնակը օտար երգերու կողքին առանձնայատուկ կերպով կը սիրէ Մայաթ Նովայի երգերը եւ օրական մեծ հաճոյքով կ'երգէ զանոնք:

## Երեխան Պէտք Զէ Հեռանայ Ազգայինէն

Հայրենի դերասանուհին կարծիքով, մենք կը թերանանք եղած մշակոյթը փոխանցելու առաքելութեան մէջ: Ամէն ինչ կախեալ է աւագ սերունդէն, թէ ան ինչպէս յաջորդ սերունդին պիտի հրամցնէ ունեցած հսկայական ժառանգութիւնը: Ան կ'աւելցնէ՝ երեխան սպունգի նման է, ի՛նչ տաս այդ կ'ընդունի: Եթէ անոր հրամցնես վատը, ապազգայինը, թրքականը, երեխան այդ կ'ընդունի եւ իրեն չափանիշ կը դարձնէ: Իւրաքանչիւր ծնող պէտք է ունենայ մէկ նպատակ՝ ամէն ձեւով երեխան մօտեցնել ազգայինի, կարեւոր է, որ երեխան չհեռանայ ազգայինէն:



[WWW.ARMENIANPRELACYKW.COM](http://WWW.ARMENIANPRELACYKW.COM)